

NUUSVRYSTELLING

(vir onmiddellike vrystelling)

TEKORT AAN STRATEGIESE ENTSTOWWE VEROORSAAK

RAMPTOESTAND IN ROOIVLEISBEDRYF

“Die tekort aan strategiese entstowwe in die vee- en dierebedrywe het nou ‘n ramptoestand in die rooivleisbedryf veroorsaak.”

“Kommersiële en opkomende produsente ly nou ernstige verliese weens bloutong uitbrekings wat tot 50 % mortaliteite onder kuddes veroorsaak en Afrika perdesiekte maai onder perde en donkies wat ‘n ondersteunende rol speel in die produksieproses van rooivleis” sê die Voorsitter van die nasionale RPO, James Faber.

Die Rooivleisprodusente-organisasie (RPO) het gewaarsku en voorspel dat dit sou gebeur weens die tekort aan voorsiening van sekere entstowwe wat slegs deur Onderstepoort Biologiese produkte (OBP) geproduseer word.

“Dit is tragies dat dit voorkom kon word indien die voorgestelde haalbare aksiestappe deur die owerheid geneem was. Ons voel die owerheid het die bedryf in die steek gelaat”, aldus mnr Faber.

Dit is ironies dat die bedryf nou maatreëls en strategieë implementeer hoe om sonder die entstowwe te produseer. Ten spyte van die RPO se advies daarteen, wend sommige produsente hulle nou tot die gebruik van onwettige ongeregistreerde entstowwe wat groot risiko’s inhou.

= 2 =

Die RPO ondersteun die aksies van die nasionale Diergesondheidsforum (NDGF) en is ook lid van die NDGF. Die RPO was deel van die NDGF se aksies wat insluit 'n ope gesprek met die Agbare Minister van Landbou op 30 Maart 2023. Tydens die vergadering is 'n sub-komitee aangestel om spoedeisend voorstelle te maak wat die Minister moes adviseer en die Minister het 'n sperdatum van 28 April hiervoor gestel. Op navraag aan die NDGF het die komitee nie vergader nie ten spyte van verskeie navrae vanaf die NDGF.

Die gebrek aan dringendheid deur die owerheid is uiters frustrerend vir die RPO.

Die traagheid om die nodige voorgestelde regstellende aksies te neem ondermyn die doelstellings van die AAMP (*Agriculture Agro-processing Master Plan*) en het ernstige dierewelsynimplikasies en hou ook risiko's in vir menslike gesondheid.

Die NDGF het namens die vee- en dierebedrywe al by verskeie geleenthede die behoeftestelling vir entstowwe gedoen en oplossings voorgestel wat onder andere insluit :-

- Entstowwe moet deur meer as een diensverskaffer geproduseer word ten einde risiko te verdiskonteer en mededingendheid te verseker;
- Kapasiteit by die kantoor van die Registrateur van Wet 36 moet verhoog word om registrasie-aansoeke vinniger te proses. Dieselfde beginsels geld vir Wet 35 aansoeke.
- Sekere entstowwe kan met behulp van die privaatsektor geproduseer word of onder 'n lisensie geproduseer word namens OBP.

Die RPO versoek dringend dat die oplossings nou deur die owerheid afgekondig en geïmplementeer moet word binne spoedeisende tydslyne.

“Alhoewel dit reeds te laat is, moet alles moontlik gedoen word om nasionale pandemies te verhoed” aldus mnr. Faber.

= 3 =

Die RPO wil dit op rekord stel dat in belang van voedselsekureit, armoedeverligting, implementering van die AAMP, menslike gesondheid, uitvoerstrategieë en dierewelsyn, meer drastiese stappe geneem sal word indien nodig, om te verseker dat die entstof kwessie spoedeisend opgelos word.



DATUM : 5 Mei 2023

NAVRAE

James Faber

Voorsitter

083 292 2556

Willie Clack

1ste Vise-voorsitter

082 574 2653